

**NACRT**

**BOSNA I HERCEGOVINA  
FEDERACIJA BOSNE I HERCEGOVINE  
BOSANSKO – PODRINJSKI KANTON GORAŽDE**

**ZAKON O IZVRŠENJU SANKCIJA U BOSANSKO-PODRINJSKOM KANTONU  
GORAŽDE**

Nosilac izrade:

Ministarstvo za pravosuđe, upravu i radne odnose Bosansko – podrinjskog kantona Goražde i  
Ministarstvo za finansije Bosansko – podrinjskog kantona Goražde

**Goražde, septembar 2020. godine**

Na osnovu člana 23. Ustava Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/98, 10/00, 5/03 i 8/04), člana 1. stav (2) i člana 219. Zakona o izvršenju krivičnih sankcija u Federaciji Bosne i Hercegovine („Službene novine Federacije Bosne i Hercegovine“, broj: 44/98, 42/99, 12/09 i 42/11) i člana 44. Krivičnog zakona Federacije Bosne i Hercegovine, („Službene novine Federacije Bosne i Hercegovine“, broj: 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), Skupština Bosansko-podrinjskog kantona Goražde, na svojoj \_\_\_\_\_ redovnoj sjednici, održanoj dana \_\_\_\_\_ donosi

## **ZAKON O IZVRŠENJU SANKCIJA U BOSANSKO-PODRINJSKOM KANTONU GORAŽDE**

### **DIO PRVI – OSNOVNE ODREDBE**

#### **Član 1. (Sadržaj)**

Ovim Zakonom uređuju se pitanja izvršenja sankcija i drugih mjera koje nisu regulisane Zakonom o izvršenju krivičnih sankcija u Federaciji Bosne i Hercegovine, Zakonom o zaštiti i postupanju sa djecom i maloljetnicima u krivičnom postupku i Zakonom o prekršajima, a odnose se na izvršenje novčane kazne, rada za opšte dobro na slobodi, mjera sigurnosti, odgojnih mjera izrečenih maloljetnom osuđenom licu, zaštitnih mjera, kao i druga pitanja od značaja za izvršenje sankcija u Bosansko-podrinjskom kantonu Goražde (u daljem tekstu: Kanton).

#### **Član 2. (Način izvršenja sankcija i mjera)**

Sankcije i mjere izrečene učiniocu krivičnog djela, (u daljem tekstu: osuđeno lice), i prekršaja (u daljem tekstu: kažnjeno lice) izvršavaju se na način uređen Zakonom o izvršenju krivičnih sankcija u Federaciji Bosne i Hercegovine i ovim zakonom ako posebnim zakonom nije drugačije propisano.

#### **Član 3. (Organi izvršenja sankcija i mjera)**

- (1) Na teritoriji Kantona, sankcije i mjere iz člana 1. ovog Zakona, za osuđena lica i kažnjena lica, koja imaju prebivalište, boravište, odnosno sjedište na teritoriji Kantona (u daljem tekstu: prebivalište), izvršavaju slijedeći organi:
  - a) sud koji je donio prvostepenu odluku kojom je sankcija izrečena (u daljem tekstu: prvostepeni sud),
  - b) općinski sud na čijem području osuđeno odnosno kažnjeno lice ima prebivalište (u daljem tekstu: Općinski sud),
  - c) organi uprave ili službe za upravu nadležne za izdavanje dozvola, odnosno odobrenja za vršenje određenog poziva, djelatnosti ili dužnosti,
  - d) J.U. „Kantonalni centar za socijalni rad“ u kojoj osuđeno maloljetno lice ima prebivalište, (u daljem tekstu: centar za socijalni rad),
  - e) ministarstvo za unutrašnje poslove Bosansko-podrinjskog kantona Goražde (u daljem tekstu: policijska uprava) u kojoj osuđeno, odnosno kažnjeno lice ima prebivalište,
  - f) nadležni inspeksijski organ čije je sjedište na teritoriji Kantona (u daljem tekstu: inspeksijski organ).

- (2) Organi iz stava (1) ovog člana izvršavaju i sankcije i mjere koje su osuđenim, odnosno kažnjenim licima, koja imaju prebivalište na teritoriji Kantona, izrekli sudovi i drugi ovlašteni organi čije sjedište nije na teritoriji Kantona.
- (3) Sankcije i mjere koje su osuđenim, odnosno kažnjenim licima, koja nemaju prebivalište, izrekli sudovi ili drugi organi čije je sjedište na teritoriji Kantona, izvršavaju ovlašteni organi određeni zakonom kantona u kojem osuđeno, odnosno kažnjeno lice ima prebivalište.

#### **Član 4.** **(Lišavanje ili ograničavanje prava)**

Lica prema kojima se izvršavaju sankcije i mjere lišavaju se prava ili se ograničavaju u pravima samo u granicama nužnim za ostvarivanje svrhe pojedinih sankcija i mjera, u skladu sa zakonom.

#### **Član 5.** **(Odluka koja se izvršava)**

- (1) Izvršenju sankcije i mjere pristupa se kad odluka kojom je izrečena sankcija, odnosno mjera postala pravosnažna i ako za izvršenje sankcije, odnosno mjere nema zakonskih smetnji (u daljem tekstu: izvršna odluka).
- (2) Sa izvršenjem sankcije i mjere može se otpočeti i prije nego što je odluka kojom je izrečena sankcija, odnosno mjera postala pravosnažna, samo ako je to zakonom posebno predviđeno.

#### **Član 6.** **(Provođenje izvršenja bez odgađanja)**

- (1) Kad su ispunjeni uslovi da se pristupi izvršenju sankcije, odnosno mjere, organ koji je izrekao sankciju, odnosno mjeru, obavezan je preduzeti potrebne radnje da se izvršenje sankcije, odnosno mjere, provede bez odgađanja, u skladu sa ovim zakonom.
- (2) Izvršenje sankcije, odnosno mjere, može biti odgođeno samo u slučajevima i pod uslovima predviđenim zakonom.

#### **Član 7.** **(Dostavljanje odluke organu izvršenja)**

Organ koji je donio prvostepenu odluku kojom je sankcija, odnosno mjera izrečena dužan je da, ako nije nadležan da je sam izvrši, izvršnu odluku dostavi organu nadležnom za izvršenje, najkasnije u roku tri dana od dana kada je odluka postala izvršna, odnosno od dana kada je tu odluku primio od višeg organa.

#### **Član 8.** **(Obavezna saradnja sa ustanovama za izvršenje sankcija i mjera i pristup međunarodnih organizacija i drugih institucija osuđenim, odnosno kažnjenim licima)**

- (1) Organi vlasti, ustanove i druga pravna lica, u čijoj nadležnosti je primjena zdravstvenih, socijalnih, odgojnih ili drugih mjera od značaja za izvršenje pojedinih sankcija i mjera, obavezni su sarađivati sa ustanovama u kojima se izvršavaju sankcije, odnosno mjere (u daljem tekstu: ustanove).

- (2) U cilju što potpunijeg ostvarivanja svrhe pojedinih sankcija i mjera, ustanove saraduju sa pravnim licima koja bi im, prema svojoj djelatnosti, mogla pružiti pomoć.
- (3) Ustanove su dužne omogućiti domaćim i međunarodnim organizacijama i drugim institucijama nadležnim za praćenje i ostvarivanje ljudskih prava i osnovnih sloboda, pristup i razgovor sa osuđenim, odnosno kažnjenim licima, u skladu sa zakonom i odgovarajućim međunarodnim dokumentima.

**Član 9.**  
**(Troškovi izvršenja)**

Lice prema kojem je primijenjena sankcija, odnosno mjera, ne plaća troškove izvršenja, osim troškova novčane kazne, kao i drugih troškova u skladu sa zakonom.

**Član 10.**  
**(Neplaćanje taksi)**

Za podneske, službene radnje, rješenja i druge akte u vezi sa izvršenjem sankcija, odnosno mjera, ne plaća se taksa.

**Član 11.**  
**(Poseban interes za Kanton)**

Poslovi izvršenja sankcija i mjera, propisani ovim zakonom, su poslovi od posebnog interesa za Kanton.

**DIO DRUGI – IZVRŠENJE NOVČANE KAZNE, RADA ZA OPĆE DOBRO NA SLOBODI I MJERA SIGURNOSTI IZREČENIH OSUĐENOM LICU**

**POGLAVLJE I. IZVRŠENJE NOVČANE KAZNE**

**Član 12.**  
**(Organ izvršenja)**

- (1) Novčanu kaznu izrečenu osuđenom licu izvršava sud koji je izrekao novčanu kaznu.
- (2) Sud izvršava i novčanu kaznu koja je u toku krivičnog postupka izrečena svjedoku, vještaku ili drugim učesnicima u postupku.

**Član 13.**  
**(Način izvršenja novčane kazne osuđenom licu)**

- (1) Novčana kazna izrečena osuđenom licu izvršava se na način propisan Krivičnim zakonom Federacije Bosne i Hercegovine.
- (2) Novčanu kaznu pravnom licu izvršava sud koji je izrekao novčanu kaznu, direktnom naplatom-blokiranjem računa pravnog lica u skladu sa odredbama Zakona o izvršnom postupku.

## **POGLAVLJE II. RAD ZA OPĆE DOBRO NA SLOBODI**

### **Član 14.**

#### **(Mjesto i način izvršenja rada za opće dobro na slobodi)**

- (1) Rad za opće dobro na slobodi izvršava se u mjestu prebivališta, odnosno boravišta osuđenog, odnosno kažnjenog lica na način propisan Pravilnikom o vrsti i uvjetima za izvršenje sankcije rada za opće dobro na slobodi.
- (2) Pravilnik iz stava (1) ovog člana donosi Ministar za pravosuđe, upravu i radne odnose Bosansko-podrinjskog kantona Goražde (u daljem tekstu: ministar).

### **Član 15.**

#### **(Vođenje službene evidencije o osuđenim licima)**

O osuđenim licima koje izvršavaju rad za opće dobro na slobodi vodi se službena evidencija u koju se unose podaci u skladu sa posebnim uputstvom koje donosi ministar.

## **POGLAVLJE III. IZVRŠENJE MJERA SIGURNOSTI**

### **Odjeljak A. Zabrana vršenja poziva, aktivnosti ili funkcije**

#### **Član 16.**

##### **(Organi izvršenja)**

- (1) Mjeru sigurnosti zabrana vršenja poziva, aktivnosti ili funkcije izvršava policijska uprava, odnosno organ uprave ili služba za upravu nadležna za izdavanje dozvole, odnosno odobrenja za vršenje određenog poziva, aktivnosti ili funkcije.
- (2) Prvostepeni sud, koji je donio odluku kojom je izrečena mjera sigurnosti zabrana vršenja određenog poziva, aktivnosti ili funkcije obavještava o tome Ministarstvo za unutrašnje poslove na čijem području osuđeno lice, prema kome je mjera izrečena, ima prebivalište.
- (3) Odluka o izrečenoj mjeri iz stava (2) ovog člana unosi se u kaznenu evidenciju.
- (4) Izvršnu odluku, kojom je izrečena mjera sigurnosti zabrana vršenja određenog poziva, aktivnosti ili funkcije, prvostepeni sud dostavlja i nadležnom inspekcijskom organu i pravnom ili drugom licu, kod kojeg osuđeno lice obavlja poziv, aktivnost ili funkciju.
- (5) Inspekcijski organ, kao i pravno i drugo lice iz stava (4) ovog člana, staraju se da osuđeno lice, u roku koji je određen odlukom, ne vrši zabranjeni poziv, aktivnost ili funkciju.

#### **Član 17.**

##### **(Način izvršenja)**

- (1) Ako je vršenje nekog poziva, aktivnosti ili funkcije na koje se zabrana odnosi vezano za dozvolu, odnosno odobrenje nadležnog organa uprave ili službe za upravu, ova mjera sigurnosti izvršava se oduzimanjem dozvole, odnosno odobrenja i zabranom njenog izdavanja dok ta mjera sigurnosti traje, uz istovremeno unošenje te mjere u evidenciju tog organa, odnosno službe.
- (2) Ako vršenje nekog poziva, aktivnosti ili funkcije nije vezano za posebnu dozvolu, odnosno odobrenje nadležnog organa uprave ili službe za upravu, mjeru sigurnosti zabrane vršenja poziva, aktivnosti ili funkcije izvršava policijska uprava, preduzimanjem potrebnih radnji, kojima se licu, prema kome je ta mjera izrečena, onemogućava da se bavi zabranjenim pozivom, aktivnošću ili funkcijom.

## **Odjeljak B. Zabrana upravljanja motornim vozilom**

### **Član 18. (Organ izvršenja i način izvršenja)**

Mjeru sigurnosti zabrana upravljanja motornim vozilom izvršava Ministarstvo za unutrašnje poslove Bosansko-podrinjskog kantona Goražde (u daljem tekstu: Ministarstvo za unutrašnje poslove), na način i po postupku propisanom Zakonom o osnovama bezbjednosti saobraćaja na putevima u Bosni i Hercegovini.

## **Odjeljak C. Oduzimanje predmeta**

### **Član 19. (Organ izvršenja i način izvršenja)**

- (1) Mjeru sigurnosti oduzimanje predmeta, izrečenu osuđenom licu i osuđenom pravnom licu, izvršava prvostepeni sud, po propisima kojima se reguliše izvršni postupak, a prema prirodi predmeta odredit će da li će se ti predmeti prodati po propisima izvršnog postupka ili će se uništiti ili ustupiti određenom državnom organu ili određenom pravnom licu, osim u slučaju kada je posebnim propisima regulisano da se sa određenim predmetima postupuje na drugačiji način.
- (2) U slučaju kada prvostepeni sud vrši prodaju predmeta za koje je izrečena mjera sigurnosti oduzimanje predmeta, prodaja tih predmeta vrši se prema odredbama Zakona o izvršnom postupku.
- (3) Troškove, koji nastanu prinudnim izvršenjem mjere sigurnosti iz stava (1) ovog člana, snosi lice kome je ta mjera izrečena.
- (4) Sredstva ostvarena prodajom, odnosno uništenjem oduzetih predmeta iz stava (1) ovog člana, u skladu sa odredbama ovog zakona prihod su budžeta Kantona.

## **Odjeljak D. Zabrana vršenja određene privredne aktivnosti**

### **Član 20. (Organ izvršenja i način izvršenja)**

- (1) Radi izvršenja mjera sigurnosti zabrane obavljanja određene privredne aktivnosti, koja je izrečena osuđenom pravnom licu, prvostepeni sud dostavlja izvršnu odluku sudu u kojem je osuđeno pravno lice registrovano, radi upisa zabrane u registar, kao i nadležnom inspekcijском organu.
- (2) Inspekcijски organ iz stava (1) ovog člana stara se da osuđeno pravno lice ne vrši zabranjenu privrednu aktivnost.

## **DIO TREĆI – IZVRŠENJE ODGOJNIH MJERA IZREČENIH OSUĐENOM MALOLJETNOM LICU**

### **POGLAVLJE I. IZVRŠENJE ODGOJNE MJERE UPUĆIVANJA U ODGOJNI CENTAR**

#### **Član 21.**

##### **(Primjena zakona u izvršenju odgojnih mjera)**

Odgojne mjere (mjere upozorenja i usmjeravanja i mjere pojačanog nadzora), izrečene osuđenom maloljetnom licu, izvršavaju se na način i po postupku utvrđenom odredbama Krivičnog zakona Federacije Bosne i Hercegovine, Zakona o zaštiti i postupanju sa djecom i maloljetnicima u krivičnom postupku i Zakona o izvršenju krivičnih sankcija u Federaciji Bosne i Hercegovine, koje se odnose na izvršenje odgojnih mjera i ovim zakonom.

#### **Član 22.**

##### **(Upućivanje u odgojni centar)**

- (1) Do osnivanja odgojnog centra na području Kantona, odgojna mjera upućivanja u odgojni centar koja je izrečena maloljetniku izvršavat će se u nekom od odgojnih centara u Federaciji Bosne i Hercegovine.
- (2) Troškove izvršenja odgojne mjere upućivanje u odgojni centar snosi Kanton na osnovu ugovora zaključenog između odgojnog centra osnovanog na području Federacije Bosne i Hercegovine i Kantona.
- (3) Ugovor iz stava (2) ovog člana u ime Kantona zaključuje ministar, uz saglasnost Vlade Kantona.

#### **Član 23.**

##### **(Dostavljanje pravosnažne i izvršne odluke centru za socijalni rad)**

Pravosnažnu i izvršnu odluku kojom je maloljetniku izrečena odgojna mjera upućivanja u odgojni centar prvostepeni sud dostavlja nadležnom centru za socijalni rad i odgojnom centru.

#### **Član 24.**

##### **(Početak izvršenja)**

- (1) Centar za socijalni rad u dogovoru sa odgojnim centrom poziva maloljetnika da se određenog dana i sata u pratnji roditelja, usvojitelja ili staratelja, javi u odgojni centar radi izvršenja odgojne mjere.
- (2) Izvršenje odgojne mjere upućivanja u odgojni centar počinje od dana kada se maloljetnik javi u odgojni centar.
- (3) Prijem maloljetnika u odgojni centar vrši se na osnovu pravosnažne i izvršne odluke suda i druge neophodne dokumentacije utvrđene opštim aktom odgojnog centra o prijemu, tretmanu i otpustu maloljetnika.

#### **Član 25.**

##### **(Obaveze roditelja, usvojitelja ili staratelja i centra za socijalni rad)**

- (1) Roditelj, usvojitelj ili staratelj maloljetnika dužan je da obezbijedi redovni dolazak maloljetnika u centar za socijalni rad radi izvršenja odgojne mjere upućivanje u odgojni centar, a u slučaju da maloljetnik, iz opravdanih razloga, bude spriječen da dođe određenog dana u centar za socijalni rad, dužan je da o tome odmah obavijesti centar za socijalni rad.

- (2) Ako se maloljetnik određenog dana i u određeno vrijeme ne javi u centar za socijalni rad ili prestane da redovno dolazi, centar za socijalni rad o tome obavještava prvostepeni sud koji je izrekao odgojnu mjeru, radi preduzimanja odgovarajućih mjera.

#### **Član 26.**

##### **(Obaveze roditelja, usvojitelja ili staratelja i odgojnog centra)**

- (1) Roditelj, usvojitelj ili staratelj maloljetnika dužan je da obezbijedi redovan dolazak maloljetnika u odgojni centar radi izvršenja odgojne mjere upućivanje u odgojni centar na neprekidan boravak.
- (3) Ako se maloljetnik određenog dana i u određeno vrijeme ne javi u odgojni centar, odgojni centar će bez odlaganja o tome obavjestiti nadležni centar za socijalni rad i prvostepeni sud koji je izrekao odgojnu mjeru, radi preduzimanja odgovarajućih mjera.

#### **Član 27.**

##### **(Vrijeme izvršavanja)**

- (1) Odgojna mjera upućivanja u odgojni centar na određeni broj sati tokom dana izvršava se u periodu od 08 do 20 sati u slobodnom vremenu maloljetnika, usklađenom sa školskim ili radnim obavezama, s tim da se maloljetniku upućenom u odgojni centar na period duži od 4 sata dnevno zavisno o vremenu provedenom u odgojnom centru osigurava odgovarajući broj obroka hrane.
- (2) Maloljetniku, upućenom u odgojni centar na neprekidni boravak na utvrđeni broj dana, obezbjeđuje se smještaj i ishrana.

#### **Član 28.**

##### **(Osiguranje redovnog pohađanja nastave u školi ili obavljanje poslova na radnom mjestu)**

Odgojna mjera upućivanja u odgojni centar na neprekidni boravak izvršava se na način da se maloljetniku omogući redovno pohađanje nastave u školi ili obavljanje poslova na radnom mjestu, s tim da mu se za vrijeme boravka u odgojnom centru tokom izvršenja te mjere osigurava smještaj i ishrana.

#### **Član 29.**

##### **(Program za rad s maloljetnikom)**

- (1) Odgojna mjera upućivanja maloljetnika u odgojni centar izvršava se prema pojedinačnom programu postupanja sa maloljetnikom, koga izrađuje stručni tim odgojnog centra u skladu sa članom 129. Zakona o zaštiti i postupanju sa djecom i maloljetnicima u krivičnom postupku.
- (2) Prilikom izrade programa iz stava (1) ovog člana mora se obezbjediti da boravak maloljetnika u odgojnom centru bude ispunjen djelatnostima primjerenim njegovim osobinama, učenjem, korisnim radom koji odgovara njegovim sposobnostima i interesima, kao i drugim odgojnim sadržajima usmjerenim na razvijanje osjećaja odgovornosti.

#### **Član 30.**

##### **(Zdravstveno osiguranje maloljetnika)**



- (1) U slučaju potrebe za pružanjem zaštite maloljetniku koji nije obavezno zdravstveno osiguran, odnosno nije zdravstveno osiguran po drugom osnovu, a koji je smješten u odgojnom centru, isti će se uputiti u najbližu zdravstvenu ustanovu o čemu će se obavijestiti zakonski zastupnik, nadležni centar za socijalni rad i prvostepeni sud.
- (2) Troškovi nastali u slučaju iz stava (1) ovog člana ubrajaju se u troškove izvršenja odgojne mjere shodno odredbama člana 130. Zakona o zaštiti i postupanju sa djecom i maloljetnicima u krivičnom postupku.

### **Član 31.**

#### **(Pridržavanje pravila kućnog reda i uputstva i savjeta)**

- (1) Maloljetnik je dužan da se, u centru za socijalni rad pridržava uputstava i savjeta od strane ovlaštenih stručnih radnika, a u odgojnom centru, dužan je da se pridržava pravilnika o kućnom redu odgojnog centra i da izvršava svoje obaveze u skladu sa pojedinačnim programom iz člana 29. stav (1) ovog zakona i opštim aktom odgojnog centra o prijemu, tretmanu i otpustu maloljetnika.
- (2) Ukoliko se mjera iz stava (1) ovog člana ne može izvršiti zbog nediscipline, ometanja ili onemogućavanja izvršenja od strane maloljetnika odgojni centar je dužan o tome obavijestiti centar za socijalni rad i prvostepeni sud u roku od 76 sati radi preduzimanja odgovarajućih mjera.

## **POGLAVLJE II. ODGODA I PREKID IZVRŠENJA ODGOJNE MJERE UPUĆIVANJA U ODGOJNI CENTAR**

### **Član 32.**

#### **(Odgoda izvršenja)**

- (1) Izvršenje odgojne mjere upućivanja u odgojni centar, može se odgoditi na molbu maloljetnika, njegovog roditelja, staratelja ili usvojitelja, bračnog druga ili na prijedlog centra za socijalni rad, samo u slučajevima:
  - a) ako je maloljetnik obolio od teže akutne bolesti,
  - b) ako se desio smrtni slučaj ili teška bolest u užoj porodici maloljetnika,
  - c) ako se maloljetnik nalazi neposredno pred završetkom škole ili polaganja ispita za koji se pripremao, pa bi mu izvršenje odgojne mjere u ovom momentu moglo nepovoljno uticati na izvršenje tih obaveza,
  - d) ako trudnoj maloljetnici do porođaja ne preostaje više od pet mjeseci, kao i maloljetnici koja ima dijete mlađe od jedne godine života.
- (2) Izvršenje odgojne mjere u slučaju tačke a) stava (1) ovog člana može se odgoditi dok bolest traje, u slučaju iz tačke b) stava (1) ovog člana – najduže za tri mjeseca, u slučaju iz tačke c) stava (1) ovog člana – najduže za šest mjeseci, a u slučaju iz tačke d) stava (1) ovog člana, trudnoj maloljetnici, kao i maloljetnici koja ima dijete mlađe od jedne godine života – do navršene jedne godine života djeteta.

### **Član 33.**

#### **(Molba za odgodu izvršenja)**

- (1) Molba za odgodu izvršenja odgojne mjere podnosi se prvostepenom sudu koji je odgojnu mjeru izrekao putem nadležnog centra za socijalni rad.

- (2) Molba iz stava (1) ovog člana podnosi se u roku od tri dana od dana prijema poziva za izvršenje odgojne mjere, odnosno od dana određenog za javljanje maloljetnika u odgojni centar radi izvršenje odgojne mjere.
- (3) Ako je razlog za odgodu izvršenja odgojne mjere iz stava (1) tačke a) i b) člana 32. ovog zakona nastao nakon isteka roka iz stava (2) ovog člana, molba se može podnijeti do dana kad maloljetnik treba da se javi radi izvršenja odgojne mjere.
- (4) U molbi se moraju navesti razlozi, činjenice i dokazi na kojima se zasniva molba za odgodu izvršenja odgojne mjere.

#### **Član 34.**

##### **(Odlučivanje o molbi za odgodu izvršenja)**

- (1) O molbi za odgodu izvršenja odgojne mjere odlučuje rješenjem prvostepeni sud koji je mjeru izrekao, u roku od osam dana od dana prijema molbe.
- (2) Prije donošenja rješenja iz stava (1) ovog člana, sudija može povjeriti centru za socijalni rad da izvrši provjeru činjenica navedenih u molbi.
- (3) Molbu koja nije podnesena u roku iz stava (2) člana 33. ovog zakona ili koja ne sadrži razloge, dokaze i činjenice za odgodu, sud odbacuje rješenjem.
- (4) Do donošenja rješenja o molbi, odgađa se početak izvršenja odgojne mjere.

#### **Član 35.**

##### **(Pravo žalbe protiv rješenja kojim se odbija odgoda izvršenja)**

- (1) Protiv rješenja kojim se odbija molba za odgodu izvršenja odgojne mjere, podnosilac ima pravo žalbe u roku od tri dana od dana prijema rješenja, Kantonalnom sudu u Goraždu (u daljem tekstu: Kantonalni sud).
- (2) Kantonalni sud donosi rješenje o žalbi u roku od tri dana od dana prijema žalbe.
- (3) Rješenje iz stava (2) ovog člana je konačno i dostavlja se, u roku od tri dana, podnosiocu molbe i centru za socijalni rad.

#### **Član 36.**

##### **(Drugi slučajevi odgode izvršenja)**

Prvostepeni sud može donijeti rješenje o odgodi izvršenja odgojne mjere i kada je podignut zahtjev za ponavljanje krivičnog postupka.

#### **Član 37.**

##### **(Prekid izvršenja)**

- (1) Na molbu maloljetnika, njegovog roditelja, usvojitelja ili staratelja i centra za socijalni rad, može se dozvoliti prekid izvršenja odgojne mjere u odgojni centar koji ne može trajati duže od tri mjeseca.
- (2) Vrijeme prekida ne uračunava se u vrijeme izvršenja odgojne mjere.
- (3) O molbi za prekid izvršenja odgojne mjere upućivanja u odgojni centar odlučuje prvostepeni sud koji je tu mjeru izrekao, u roku od osam dana od dana prijema molbe.

## **DIO ČETVRTI – IZVRŠENJE PREKRŠAJNIH SANKCIJA**

### **POGLAVLJE I. UKOR**

**Član 38.**  
**(Organ izvršenja i vođenje evidencije)**

- (1) Izrečenu sankciju ukor u prekršajnom postupku izvršava prvostepeni sud koji je tu sankciju izrekao tako da se ista posebno evidentira u prvostepenom sudu.
- (2) Prvostepeni sud utvrdit će način vođenja evidencije iz stava (1) ovog člana.

**POGLAVLJE II. ZAŠTITNE MJERE**

**Odjeljak A. Oduzimanje predmeta**

**Član 39.**  
**(Organ izvršenja i način izvršenja)**

- (1) Zaštitnu mjeru oduzimanja predmeta izvršava prvostepeni sud, odnosno organ koji je tu zaštitnu mjeru izrekao.
- (2) Prema prirodi oduzetih predmeta prvostepeni sud, odnosno organ koji je ovu mjeru izrekao, odredit će da li će se oduzeti predmeti prodati prema propisima Zakona o izvršnom postupku, ustupiti određenom organu ili određenom pravnom licu, ustanovi ili humanitarnoj organizaciji, uništiti ili sa njima postupiti u skladu sa posebnim propisima.
- (3) Troškove koji nastanu prinudnim izvršenjem zaštitne mjere iz stava (2) ovog člana snosi lice kome je ta mjera izrečena.
- (4) Ukoliko prvostepeni sud, odnosno organ koji je izrekao zaštitnu mjeru, odluči da se oduzeti predmeti unište, uništavanje će izvršiti fizičko, odnosno pravno lice koja bude izabrano nakon provedenog postupka u skladu sa Zakonom o javnim nabavkama Bosne i Hercegovine.
- (5) Sredstva dobijena prodajom odnosno uništenjem oduzetih predmeta prihod su budžeta Kantona.

**Odjeljak B. Zabrana vršenja poziva, djelatnosti ili dužnosti**

**Član 40.**  
**(Organ izvršenja i način izvršenja)**

- (1) Zaštitna mjera zabrane vršenja poziva, djelatnosti ili dužnosti izvršava se na način da prvostepeni sud koji je donio rješenje o prekršaju odnosno ovlašteni organ koji je izdao prekršajni nalog bez odlaganja unose o tome podatke u elektronskoj formi u prekršajnu evidenciju.
- (2) Podaci o izrečenoj zaštitnoj mjeri iz stava (1) ovog člana evidentiraju se u skladu sa propisom o sadržaju i načinu vođenja prekršajne evidencije koji na osnovu člana 99. stav (5) Zakona o prekršajima donosi Federalni ministar unutrašnjih poslova uz saglasnost Federalnog ministra pravde.

**Odjeljak C. Potpuna ili djelimična zabrana upravljanja motornim vozilom**

**Član 41.**  
**(Organ izvršenja i način izvršenja)**

Zaštitnu mjeru potpune ili djelimične zabrane upravljanja motornim vozilom izvršava Ministarstvo za unutrašnje poslove, na način i po postupku propisanom Zakonom o osnovama bezbjednosti saobraćaja na putevima u Bosni i Hercegovini.

#### **Odjeljak D. Vanbolničko liječenje od zavisnosti**

##### **Član 42. (Organ izvršenja i način izvršenja)**

- (1) Zaštitna mjera vanbolničkog liječenja od zavisnosti izvršava se u ovlaštenoj ustanovi koju odredi prvostepeni sud, na način koji odredi prvostepeni sud.
- (2) Ustanovu u koju prvostepeni sud uputi kažnjeno lice radi vanbolničkog liječenja zavisnosti, dužna je izvještavati prvostepeni sud o tome da li se kažnjeno lice podvrglo određenom vanbolničkom liječenju.
- (3) O neurednom odazivanju kažnjelog lica ili prekidu određenog vanbolničkog liječenja, ustanova je dužna obavijestiti prvostepeni sud, odmah po saznanju a najkasnije u roku od 15 dana ili u drugim rokovima koje odredi prvostepeni sud.
- (4) Troškove obaveznog liječenja, za lice koje nije zdravstveno osigurano, kao i dio troškova koje, po posebnim propisima, snosi sam osiguranik, za kažnjeno lice koje ima prebivalište na području Kantona, snosi Kanton.

#### **Odjeljak E. Druge zaštitne mjere propisane posebnim zakonom**

##### **Član 43. (Način i uvjeti izvršenja)**

Druge zaštitne mjere propisane posebnim zakonom izvršavaju se na način i pod uslovima utvrđenim tim zakonom.

#### **DIO PETI – IZVJEŠTAVANJE O IZVRŠENJU SANKCIJA**

##### **Član 44. (Podnošenje izvještaja)**

- (1) Organi iz člana 3. ovog zakona, dužni su podnositi izvještaj Skupštini Bosansko-podrinjskog Kantona Goražde (u daljem tekstu: Skupština) o izvršenju sankcija iz člana 1. ovog zakona, najmanje jedanput godišnje.
- (2) Organi iz stava (1) ovog člana dužni su, po zahtjevu Skupštine ili Ministarstva za pravosuđe, upravu i radne odnose Bosansko-podrinjskog kantona Goražde (u daljem tekstu: Ministarstvo), podnositi izvještaje o izvršenju sankcija i za kraći period ili samo za određenu vrstu sankcija.

##### **Član 45. (Metodologija podnošenja izvještaja)**

Izvještaj o izvršenju sankcija iz člana 44. ovog zakona podnosi se putem ministarstva, po metodologiji koju, pravilnikom, utvrđuje ministar.

#### **DIO ŠESTI – KAZNE NE ODREDBE**

**Član 46.**  
**(Kaznene odredbe)**

- (1) Ako posebnim propisom nije drugačije određeno, osuđeno lice koje vrši poziv, aktivnost ili funkciju koja mu je zabranjena u krivičnom postupku, odnosno lice koje vrši poziv, djelatnost ili dužnost koja mu je zabranjena u prekršajnom postupku, kaznit će se za prekršaj novčanom kaznom od 300,00 do 1.500,00 KM.
- (2) Pravno lice koje osuđenom, odnosno kažnjenom licu povjeri vršenje poziva, aktivnosti ili funkcije, odnosno poziva, djelatnosti ili dužnosti koje su mu zabranjene, kaznit će se za prekršaj novčanom kaznom od 1.000,00 do 5.000,00 KM, a odgovorno lice u tom pravnom licu, novčanom kaznom od 200,00 do 1.000,00 KM.
- (3) Ako posebnim propisom nije drugačije određeno, pravno lice koje vrši privrednu djelatnost koja mu je zabranjena kaznit će se za prekršaj novčanom kaznom od 1.000,00 do 5.000,00 KM, a odgovorno lice u pravnom licu novčanom kaznom od 200,00 do 1.000,00 KM.
- (4) Odgovorno lice banke, kaznit će se za prekršaj novčanom kaznom od 100,00 do 500,00 KM, ako u određenom roku ne dostavi obavještenje, odnosno dokaz o izvršenoj naplati sudu ili drugom nadležnom organu koji je izdao nalog za naplatu.
- (5) Ako posebnim propisom nije drugačije određeno, obrtnik koji vrši djelatnost koja mu je zabranjena kaznit će se za prekršaj novčanom kaznom od 1.000,00 do 1.500,00 KM.

**DIO SEDMI – PRIJELAZNE I ZAVRŠNE ODREDBE**

**Član 47.**  
**(Izvršavanje pravnosnažnih odluka inostranih sudova i sankcija izrečenih stranim državljanima i licima bez državljanstva)**

- (1) Po odredbama ovog zakona izvršavaju se i pravosnažne odluke inostranih sudova, ukoliko posebnim zakonom Bosne i Hercegovine ili međunarodnim ugovorom nije drugačije određeno.
- (2) Po odredbama ovog zakona izvršavaju se i sankcije izrečene stranim državljanima i licima bez državljanstva, ukoliko posebnim zakonom Bosne i Hercegovine ili međunarodnim ugovorom nije drugačije određeno.

**Član 48.**  
**(Rok za donošenje pravilnika)**

Pravilnik iz člana 45. ovog zakona, donijet će ministar u roku od 90 dana od dana stupanja na snagu ovog zakona.

**Član 49.**  
**(Ravnopravnost spolova)**

Gramatička terminologija korišćenja muškog ili ženskog roda u ovom zakonu podrazumijeva uključivanje oba roda.

**Član 50.**  
**(Prestanak važenja Zakona)**

Stupanjem na snagu ovog zakona prestaje da važi Zakon o izvršenju sankcija u Bosansko-podrinjskom kantonu Goražde („Službene novine Bosansko-podrinjskog kantona Goražde“, broj: 18/01).

**Član 51.**  
**(Stupanje na snagu Zakona)**

Ovaj zakon stupa na snagu osmog dana od dana objavljivanja u „Službenim novinama Bosansko-podrinjskog kantona Goražde“.

Broj \_\_\_\_\_  
Goražde, \_\_\_\_\_ 2020. godine

PREDSJEDAVAJUĆA  
SKUPŠTINE KANTONA

*Daliborka Milović*

# O B R A Z L O Ž E N J E

## I P R A V N I O S N O V

Pravni osnov za donošenje Zakona o izvršenju sankcija u Bosansko – podrinjskom kantonu Goražde sadržan je u odredbama člana 23. Ustava Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/98, 10/00, 5/03 i 8/04), člana 1. stav (2) i člana 219. Zakona o izvršenju krivičnih sankcija u Federaciji Bosne i Hercegovine („Službene novine Federacije Bosne i Hercegovine“, broj: 44/98, 42/99, 12/09 i 42/11) i člana 44. Krivičnog zakona Federacije Bosne i Hercegovine, („Službene novine Federacije Bosne i Hercegovine“, broj: 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17).

## II R A Z L O Z I D O N O Š E N J A

Zakon o izvršenju sankcija u Bosansko – podrinjskom kantonu Goražde donesen je 28.11.2001. godine i objavljen je u „Službenim novinama Bosansko – podrinjskog kantona Goražde, broj:18/01“. Pomenuti zakon regulisao je izvršenje odgojne disciplinske mjere upućivanja u disciplinski centar za maloljetnike, izrečene u krivičnom postupku maloljetnim učiniocima krivičnih djela, na osnovu Krivičnog zakona Federacije BiH. Novim Zakonom o zaštiti i postupanju sa djecom i maloljetnicima u krivičnom postupku („Službene novine Federacije BiH“, broj:7/14)(*objavljen dana 29.01.2014. godine, a počinje sa primjenom 06.02.2015. godine*), utvrđena su posebna pravila postupanja prema djeci koja su u sukobu sa zakonom, mlađim punoljetnim osobama i djeci koja su žrtve ili svjedoci prema kojima su dužni postupati sudovi, tužilaštva, uključujući ovlaštene službene osobe, organe starateljstva, porodice, škole, institucije na svim nivoima društvene zajednice, kao i druge učesnike uključene u krivične procedure, te utvrđena obaveza da se do početka njegove primjene, usklade odredbe Krivičnog zakona, Zakona o krivičnom postupku, Zakona o izvršenju krivičnih sankcija, Zakona o prekršajima i odredbe drugih propisa iz oblasti zaštite prava djece i maloljetnika sa ovim zakonom. Toj obavezi podliježe i ovaj kantonalni zakon.

Takođe, ističemo da trenutno važeći zakon nije poznavao alternativnu sankciju rad za opće dobro na slobodi, obzirom da je članom 44. stav (7) Krivičnog zakona Federacije Bosne i Hercegovine regulisano da raspoređivanje na rad za opće dobro na slobodi, u smislu vrste i radnog mjesta obavlja kantonalno ministarstvo nadležno za poslove pravosuđa prema mjestu prebivališta, odnosno boravišta osuđenika. Isto tako, bitno je istaći i da je afirmacija i izvršenje alternativnih sankcija, posebno rada za opće dobro na slobodi, obaveza kantonalnih ministarstava pravosuđa utvrđena u Strategiji za reformu sektora pravde u Bosni i Hercegovini, koju je usvojilo Vijeće ministara Bosne i Hercegovine, u dijelu koji se odnosi na izvršenje krivičnih sankcija, kao jedna od mjera za rasterećenje postojećih zatvorskih kapaciteta.

Programom rada Skupštine Bosansko – podrinjskog kantona Goražde, Vlade Kantona i Ministarstva za pravosuđe, upravu i radne odnose Bosansko – podrinjskog kantona Goražde za 2020. godinu planirano je u III Kvartalu donošenje Zakona o izmjenama i dopunama Zakona o izvršenju sankcija u Bosansko – podrinjskom kantonu Goražde, ali na osnovu naprijed navedenog i usklađujući trenutno važeći kantonalni Zakon o izvršenju sankcija sa odredbama gore pomenutih Zakona utvrđeno je da se mijenja više od polovine članova, te je stoga ovo ministarstvo u skladu sa članom 46. stav (3) Jedinistvenih pravila za izradu propisa u institucijama Bosne i Hercegovine („Službeni glasnik BiH“, broj:11/05,58/14,60/14,50/17 i 70/17), pristupilo izradi novog Zakona.

### **III PRAVNA RJEŠENJA**

#### **OBRAZLOŽENJE ZNAČAJNIH PRAVNIH RJEŠENJA**

##### **DIO PRVI – OSNOVNE ODREDBE**

Član (1-11) – ovim odredbama uređuju se pitanja izvršenja sankcija i drugih mjera koje se odnose na: izvršenje novčane kazne, rada za opće dobro na slobodi, mjera sigurnosti, odgojnih mjera izrečenih maloljetnom osuđenom licu, zaštitnih mjera i drugih pitanja koja su od značaja za izvršenje sankcija u Bosansko – podrinjskom kantonu Goražde. Takođe propisan je i način izvršenja sankcija i mjera, organi izvršenja sankcija i mjera, lišavanje ili ograničavanje prava, način na koji se odluka kojom je izrečena sankcija izvršava, provođenje izvršenja bez odgađanja, dostavljanje odluke organu izvršenja, obavezna saradnja sa ustanovama za izvršenje sankcija i mjera i pristup međunarodnih organizacija i drugih institucija osuđenim, odnosno kažnjenim licima, troškovi izvršenja, neplaćanje taksi, kao i to da su poslovi izvršenja sankcija i mjera poslovi od posebnog interesa za Kanton.

##### **DIO DRUGI – IZVRŠENJE NOVČANE KAZNE, RADA ZA OPĆE DOBRO NA SLOBODI I MJERA SIGURNOSTI IZREČENIH OSUĐENOM LICU**

###### **POGLAVLJE I. IZVRŠENJE NOVČANE KAZNE**

Član (12-13) - Ovo poglavlje sadrži odredbe koje se odnose na organe izvršenja novčane kazne, kao i način izvršenja novčane kazne osuđenom licu.

###### **POGLAVLJE II. RAD ZA OPĆE DOBRO NA SLOBODI**

Član (14-15) – Ovo poglavlje reguliše mjesto i način izvršenja rada za opće dobro na slobodi i vođenje službene evidencije o osuđenim licima.

###### **POGLAVLJE III. IZVRŠENJE MJERA SIGURNOSTI**

Član (16-20) – Ovim poglavljem regulisane su slijedeće mjere sigurnosti: zabrana vršenja poziva, aktivnosti ili funkcije, zabrana upravljanja motornim vozilom, oduzimanje predmeta i zabrana vršenja određene privredne aktivnosti, te utvrđeni organi izvršenja i način izvršenja pomenutih mjera.

##### **DIO TREĆI – IZVRŠENJE ODGOJNIH MJERA IZREČENIH OSUĐENOM MALOLJETNOM LICU**

###### **POGLAVLJE I. IZVRŠENJE ODGOJNE MJERE UPUĆIVANJA U ODGOJNI CENTAR**

Član (21-31) – Ovim poglavljem regulisana je primjena zakona u izvršenju odgojnih mjera, upućivanje u odgojni centar, dostavljanje pravosnažne i izvršne odluke centru za socijalni rad, početak izvršenja odgojne mjere, obaveze roditelja, usvojitelja ili staratelja i centra za socijalni rad, obaveze roditelja, usvojitelja ili staratelja i odgojnog centra, vrijeme izvršavanja odgojne mjere upućivanja u odgojni centar, osiguranje redovnog pohađanja nastave u školi ili obavljanje poslova na radnom mjestu kod odgojne mjere upućivanja u odgojni centar na neprekidni boravak, program za rad s maloljetnikom, zdravstveno osiguranje maloljetnika, pridržavanje pravila kućnog reda.



## **POGLAVLJE II. ODGODA I PREKID IZVRŠENJA ODGOJNE MJERE UPUĆIVANJA U ODGOJNI CENTAR**

Član (32-37) – Ovim poglavljem propisano je u kojim slučajevima se može odgoditi izvršenje odgojne mjere upućivanja u odgojni centar, kome se podnosi molba za odgodu izvršenja, ko odlučuje o molbi za odgodu izvršenja, pravo žalbe protiv rješenja kojim se odbija odgoda izvršenja, drugi slučajevi odgode i prekid izvršenja.

## **DIO ČETVRTI – IZVRŠENJE PREKRŠAJNIH SANKCIJA**

### **POGLAVLJE I. UKOR**

Član 38. – regulisano je ko izvršava izrečenu sankciju ukor u prekršajnom postupku, kao i vođenje evidencije o izrečenoj sankciji.

### **POGLAVLJE II. ZAŠTITNE MJERE**

Član (39.- 43.) – ovim poglavljem regulisane su slijedeće zaštitne mjere: oduzimanje predmeta, zabrana vršenja poziva, djelatnosti ili dužnosti, vanbolničko liječenje od zavisnosti i druge zaštitne mjere propisane ovim zakonom, te su utvrđeni organi izvršenja i način izvršenja pomenutih zaštitnih mjera.

### **DIO PETI – IZVJEŠTAVANJE O IZVRŠENJU SANKCIJA**

Član (44.- 45) – ovim članovima propisano je podnošenje izvještaja o izvršenju sankcija, kao i podnošenje istog po metodologiji koju pravilnikom utvrđuje Ministar za pravosuđe, upravu i radne odnose BPK-a Goražde.

### **DIO ŠESTI - KAZNENE ODREDBE**

Član 46. – Ovim članom regulisane su kaznene odredbe za lica koja ne postupaju po odredbama ovog zakona.

### **DIO SEDMI – PRIJELAZNE I ZAVRŠNE ODREDBE**

Član (47.-51.) - Ovim članovima propisano je izvršavanje pravosnažnih odluka inostranih sudova i sankcija izrečenih stranim državljanima i licima bez državljanstva, rok za donošenje podzakonskog propisa, jezičko uređenje zakona, kojim je propisano da odredbe ovog zakona odnose se podjednako na lica muškog i ženskog spola, bez obzira na rod imenice upotrebljen u tekstu Zakona, prestanak važenja zakona o izvršenju sankcija u BPK-a Goražde iz 2001. godine i podzakonskih akata, kao i stupanje na snagu ovog zakona.

## **IV. OČEKIVANI EFEKTI**

Donošenjem ovog zakona doći će do usklađivanja sa zakonskim propisima koji regulišu ovu oblast, a samim tim unaprijedit će se i sitem izvršenja sankcija u Bosansko – podrinjskom kantonu Goražde.

## **V. FINANSIJSKA SREDSTVA**

Donošenje ovog Zakona ne iziskuje dodatna finansijska sredstva u buždetu Bosansko –  
podrinjskog kantona Goražde